

YMA thiltum: 1. Hunawl hman that. 2. Zofate hmasawwna ngaihtuah. 3. Kristian nun dan tha ngaihsan

Vol. 43		Issue No. 32		Ramhlun North: Ni 09 August, 2025	
 BRANCH THU THAR ■ Ni 12.08.2025 (Thawhlelni) zanah Branch Executive Committee Meeting neih tur a ni a, member te remchang lo insiam tura hriattir kan nie. ■ Pu C. Lalrochama, C-Sec. chu kan Thlanmuala, kan bungraw chhia a thlawnin min siamsak a, a chungah hruaitu ten lawmthu an sawi. ■ Central YMA Futsal Tournament-ah kan branch chu round of 64-ah Electric Veng branch YMA lakah kan vanduai hlauh mai. Ngaihhraina Bottle thanhnem tak kan dawng.  CENTRAL YMA THU ■ Home Minister Pisa-ah Mizorama ruihhlo luar zel tur venna atana beihpui thlak dan tur chungchang meeting neih a ni a, Central YMA OB te an tel. ■ E-in-C, PWD Mini Conference Hall, Tuikhuahtlangah Mizoram chhunga Motor kawngpui te a lo that zawk theihna tura Central YMA leh MPWD te Thawhhona tur Thuthlung (MoU) ziah (Sign) a ni a, Central YMA aiawhin Pu Lalmachhuana President leh Prof. Malsawmliana Gen. Secretary ten hming an sign. Thawhhona hian kum thum (3) chhung a huam ang. ■ Commandant, 225 Bn. CRPF, Zemabawk-in Central YMA hruaitute chu a Office-a leng tura a sawm angin, Prof. Malsawmliana Gen. Secretary, Tv. Zochhuana CEC, Pu C. Laldinliana CEC, Pu P.C. Lalthanhlira CEC te bakah Zemabawk Branch YMA President leh Secretary te an leng a, an hruaitu dangte bakah, Pu Henzang, DIG, CRPF Range, Tripura te nen an inkawm.  SECTION THU THAR ■ Saizahawla Section: Nizan khawhar in ban khan Radio-a an drama chan tur an section bungraw dahnaah an record.		Ramhlun North Branch YMA Library (Hmalakna leh Hmachhawpte) Ramhlun North, the 9th August, 2025: YMA Library hi NGO Library Registration atanga a lan dan chuan kum 1997-a din niin a lang a, a chhan chu a Registration hi Jan. 1998-a neih a nih vang a ni. A din tirhah chuan Ramhlun Indoor Stadium hnunga VC House hnuai, Children's Recreation Centre (CRC) thinah khan bul tan a ni a, din a nih kum tawp lamah tuna YMA Committee Room hnuai, RSC Field-ah hian sawn thlak a ni a, Library building hawwna pawh kum 1998-ah neih a ni. Kum 28 vel zet a vei hnuah kum 2024 khan Chawngbawla Rûnah sawn thlak leh a ni. A awmna a mawng tual tuala, chutih rualin a changtlung tulh tulh emaw tih tur a ni thung. Chawngbawla Rûn hi a hma ai chuan a zauin a thengthaw nuam zawk hle a, bengchheng a tlem zawk a, Library-a lehkhachhiar duhte tan pawh pan man awm tak a ni. Kum 2024 chhung zawng khan Library-a lehkhahute chhinchhiah that leh vek a ni a, hei vang hian nikum chhung khan mipui tan vawi khat mah hawn a ni lo. Kuminah pawh kum tir atangin hnattlang nei lehin May Ni 3 Inrinni khan a duh apiang tan hawn tan a ni ta a ni. Ramhlun North Branch YMA Exe. Committee remtihna Library tih changtlunna hi theih ang anga kalpui a ni a, sum pawh thahnem tak a sêng nghe nghe a ni. Branch YMA sum bakah heng a hnuai a tarlante atang hian fund/donation kan dawng: 1. Samagra Shiksha, Aizawl District: Samagra atang hian Library tih changtlunna tur atana pawimawh em em, Internet kum khat atan sponsorship an dawng a an lawm hle. A mamawh apiangte tan Library hawn ni apiangin a thlawnin a hman theih. 2. MLA Fund: Aizawl North II A/C Bialtu leh Minister ni baw, Dr. Vanlalhlana'n a fund atangin Rs. 1,00,000 lai a pe a. Hemi hmang hian Lehkhabu Rs. 50,000 man baw vel lei a ni. Lehkhabu dahna leh Lehkha chhiarna dawhkan siam niin Printer lei leh tum mek a ni. MLA Fund atang hian Website siam thar niin peih fel a ni tawh baw. Bialtu MLA hnenah lawmthu an sawi. 3. Computer Set Thar: Thorang A/C Bialtu leh kan veng pa, Er. Rohmingliana hnen atangin Computer Set thar hlak leh Lehkhabu 10 lai an dawnga, an mamawh a phuhruksaknaah lawmthu an sawi. 4. LBS Suzuki: Anni hnen atang hian Library mamawh leina turin Rs. 20,000 lai an dawng a an lawm hle. Computer Table, Revolving Chair leh Book Rack pakhat lei nan hman a ni. 5. SB Enterprise, Ramhlun North: SB Enterprise hian an mamawh em em Reading Chair 12 leh Duty Chair 5 lai an rawn donate-a, chair hlui tak takte an thlak theih phah a an lawm tak zet. 6. Ethan go Mobile & Member atangin: Ethan go Mobile dawr neitu Pu John Lalrindika Ralte hnen atangin lehkhahu duh bik leina tur pawisa thahnem tak an dawnga an lawm hle. Ani bakah hian T-Sec. atangin lehkhahu subscribe-na tur an dawng bawka, anni pahnih atanga an pawisa dawn hian an lehkhahu duhte lak fel a ni tawh nghe nghe a ni. 7. Membership Fee: Membership fee atangin sum eng emaw zat hmuh a ni a, tlawmngaia member nite hnenah lawmthu an sawi mawlh mawlh a ni. Heta tanga an sum hmuh hmangin Lehkhabu tam tak lei a nih bakah Library tih changtlun nan hman chhoh mek a ni. YMA Library hmalak tawhna thenkhatte han tarlang leh ila: 1. April atang khan Membership drive neih tan a ni a, member 534 lai hmuh a ni a, a lawmawm hle. Kar kal ta thleng khan member hi an la awm belh zela, Veng pawn atanga member a nih theih leh theih loh thlengin zawhna an dawng hial a ni. Member hi chhungkaw aiawhin mi pakhat zel nih tirin Library Card an inhman tawm thei vek. 2. MLA Fund atanga website siam chu peih fel tawh a ni a, website hi www.rnymalibrary.com a ni. Website atang hian Library-a lehkhahu neih zawng zawng (Souvenir leh Magazine tih loh), hawh chhuah a nih leh nih loh thlengin a hmuh theih a, website-ah hian MARYMA column siam tel niin issue apiang chhiar theih a ni baw. Souvenir leh Magazine hi Almira pakhat dah niin Veng/khua, Kohhran leh pawl hrang hrang chanchin thahnem tak a awm. 3. Children's Corner mawi hnai tak siam tura hmalak mek a ni a, Artificial turf pawh phah tum mek a ni. Library Sub-Committee hian naupang atanga Lehkhabu chhiar ngainat tir leh hi a tum lian ber pakhat a nih avangin an puala hmun siam sak ngei hi a tum ruh hle a, an pual bik lehkhbua leina tur paw'n sum a seng hnem ber nghe nghe a ni. 4. Library tlawhtute'n an lehkhahu duh zawng awlsam zawka an zawn zung zung theihna turin Computer pakhat ruahman a ni a, Internet pawh thlun a ni. 5. Printer a mamawhtute tan hman theih tura chhawp tum a ni a, a rang lama lei thuai a ni ang. 6. Aqua Guard dah niin tui thianglim in tur a awm reng. 7. Reading Table mi 8 lehkha chhiar theihna siam thar niin Library tlawh thinte chuan an hlut hle. 8. Social Media lamah Instagram neini veng chhung mipuite follow turin an ngen. (Phek 3-naah chhunzawm a ni)			



Digital Technology in min chiahpiah hneh tawh lutukna khawvel leh Lifestyle in thlak chak tawh lutukna khawvelah kan cheng mek a. A ruala nunphung her mil pawh kum upa lam tan chuan a ngaihna a awm tawh lo a ni ber. Tunlai khawvel angah hian Library tangkaina leh pawimawhna te hi enkan an awl ta hle mai, mah se, a tangkaina leh a pawimawhna te hi a la hlauh miah lo thung. Lehkhabu chhiar/ hawhna hmun a ni mai lova, zirna leh thiamna tak tak min pekna hi a hlutna ber chu a ni.

Tupawh a duh apiang te tan hriat zauna te, hriat fiah thiamna te min pe a. Zirlai kan ni emaw, hna zawng kan ni emaw, thil chik mi kan ni emaw, hun awl hnawhkhah duh kan ni emaw, kan khawvel la daikai ngai lohna ramah min thlen thin.

Tunlai social media lamah a bikin video lamah te thil tihdan chi hrang hrang tawi te tein entur a awm tawh a. Heng te hian kan nun a kaihruai tawh hle mai. Thiamna tak tak nei tur chuan a ziak ngeia chhiar hi a lo tlo ber fo thin. Hna zawnga leh zirlai exam-naah ang te pawh a chhiar hnem apiang a thiam thiam an ni zel. Chutih rual chuan digital media hian kan nun pum deuhthawh hi a luahkhat tawh a, hengte avang hian print media hian kan nunah hmun a chang thuk lo telh telh niin a lang. Ram changkang leh thang nasa apiangah Library an ngai pawimawh a, Digital Technology kan uarna khawvelah pawh Library hlutna leh tangkaina a tlahniam chuang lo. An ngaihlu tulh tulh zawk a ni.

Kan vengin YMA Library changtluang tak kan nei a, hetah hian lehkhabu sangnga (5000) chuawg awmin Vengkhatin a a enkawl library-ah chuan Mizorama changtluang pawl tak a ni. Library hlutna leh tangkaina hi kan inzirtir chhoh zel a ngai a, kuta kan khawih theih ngei lehkhabu chhiar hian thiamna mai bakah hriatna a tinghet a. Kan veng in a Library kan neih hi kan hman tangkai thiam a, nu leh pa te pawhin kan fate library ngaihlu tura kan zirtir zel a pawimawh awm e.



THLAAH KHIAN MIHRING KAN NUNG THEI ANG EM?

Tungchho a kal tawh phawt chuan Thla hi hre lo kan awm awm lo ve. Hmasang mite chuan Thla hi lunglu eng tak, mihringte kal leh lawn theihna chi rual lohah an dah a. Hmun tam takah phe chu Pathian atan te pawh an hman hial a ni.

Thla hi Van (heaven) a thil awm zingah, Leiin han hnaih ber a ni a. Lei atangin 38,000 km vel a hlaah a awm a. Chumi awmzia chu, nikhat-ah 60 km vela hla kal ta zel ila, lei atanga thla awmna thleng turin kum 15 vel kan mamawh dawn tihna a ni. Hetiang chiah a chakin lei atangin ni panin kal ta thung ila, ni thleng tur chuan kum 6370 lai kan mamawh thung dawn a ni.

Mihringte finna leh thiamna a lo sang zel a. Thla chanchin pawh chiang leh chipchiar zawk a hriat duhna a lo piang ve zel bawk a. Thla chanchin chiang zawka hriat nan mithiamte chuan vawi tam tak lawn tumin an bei a. Kum 1967 a lo thlen meuh chuan American Scientist te chuan Thla lawng (Space Craft) chu mihring tel lovin thlaah an han tum tir thei ta a. He khawl hian Thlaa thil awm dan leh a boruak lum leh vawt dan chenin lei lamah a thawn thla a. Heta tang hian thla a awm dan, a hmun a chet dan turte an hriat thieh phah a. Kum 1969 July ni 20 a lo thlen leh meuh chuan, Neil Armstrong, American Scientist chhuanvawr chu thlaah a han lawn thei ta der a. Thla leilungte rawn hawnin, chuta tang chuan thla chanchin ngun leh uluk zawkin an zir thei ta a. Chuta tang chuan thla chu kum maktaduai 4600 kal taah khan Arsi kehthem lian tak tak te inhlawmkhawmin an siam a ni tih an rinzawn thei a. Lei atanga a lan dan chuan, thil bial eng tak leh mualrem hmel tak a ni a. Mahse a takah chuan a rualrem lovin, tlang sang leh kawr thuk tak tak te a awm teuh a ni. He kawr zau leh thuk tak te hi arsi kehthem in thla vawi tam tak a lo sut thin avanga awmah an ring a ni.

Thla ah khian mihring nun theihna a awm em tih hi tun thleng pawhin mithiamte zingah zawhna langsar tak a la ni reng a. Ring an awm laiin ring lo tam takan awm bawk. I han chhui zau dawn teh ang.

Thla boruak (sik leh sa) hi mihring tan a duhawm lo hle a. Thlaah chuan chhun leh zan hian hun an awh rei dun hle a, ni 14 lai a rei an awh ve ve a ni. Chumi awmzi chu thla ah chuan an zan khat hi keiniin ni 14 (chawlhkar hnih han tih) lai a rei a ni a, an chhun pawh ni 14 laia rei tho bawk a ni. Chu bakah thlaah boruak a awm mumal loh

avangin ni hnaih lam ram chu a sa em em a, temperature pawh 150°C lai a sang te a ni thin. Mahse ni hlat lam (hmu lo lam) erawh chu a vawt hle thung a, temperature pawh -150°C lai a hniamah a thla thla thei thung a ni. Leiah nipui lain temperature 50°C vel lek a kaiin emaw, thlasik laiin 0°C aia hniam a a tlak thlak in mi tam takin nunna an chan phah thin a ni a. Lei leh thla leilung sik leh sa han khaikhin chuan, mihring tan nun theihna a awm hmel loh hle a ni. A lum lutuk vang emaw, a vawh lutuk vangin emaw kan nun chhuah zawk a rinawm loh a ni.

Tin, thlaah hian lei hipna a awm ve loh avangin thil reng rengin an rihna an hlauh a. Mihring te hi lei aiin thla ah a let ruk velin kan zang zawk a ni. Tin, lei hipna a awm loh avangin thil nawi te te pawh thli chhem len ang main an leng chum chum a, hei hian kawhmuh a tifiav lovin, mihring tan harsana nasa tak a thlen thei a ni. Tin, thlaah tui a awm loh avangin mihring tan nun a harsa hle ang tih a rin theih bawk a ni.

Nimahsela, mithiamte chuan heng harsana awm thei chi hrang hrangte hi hre vek mahsela beidawng duh mai lovin, nasa leh urhsun zawkin tan an la sauhsauh zawk a. Engtik niah emaw chuan thlaah khian bu la khuar ngei tumin, beiseina mitin an thlir reng bawk a ni.

December ni 2, 1996 a lo thlen chuan, American Scientist te chuan chhimtawp (South Pole) ah tui khang an hmuchhuak hlauh a, he tuikhang hi khuarkhurum thuk tak, Mt. Everest san zawng ai mah a thuk a awm a ni a. Radar signal-in a teh danin feet eng emaw zat a thuk, dilte nen tiat vel tur a ni a. He thil an hmuhchhuah hian thla chanchin zirtute a ti lawmin, an beiseina a tisang lehzuol sauhsauh a. “Thlaah khian tui a awm chuan thlai kan ching anga, boruak hip tur (oxygen) a lo awm chawp ang. Chaw pawh lei atanga ken ngai lovin thlaah kan siam ang a, mihring tan chenna tlakah kan siam thei dawn a ni” an ti a. Tui chu thlaah chuan lo awm tehreng pawh nise, thlaah khian mihring nun theihna a awm dawn em? Harsatna namen lo chu hmachhawn a ngai ngei ang. Boruak lum leh vawt lutuk a khawsak nan, thawmhnaw tha chungchuang uluk taka buatsaih a ngai ngei ang. Tin, harsatna tam tak kal tlangin mihringte chen theih nan lo siam pawh ni ta sela, Arsi kehthem leh simeikhu ten an sut fo thin chuan mihring tan a him ang em tih pawh ngaihtuah tham tak a ni.

A tawp berah chuan, thlaah khian mihring nun theihna a awm em tih chhanna hi rinthu mai a la ni a, tun atanga rei lo teah a chhanna dik zawk hriat theih thuai beisei a ni.

- Dr. Zirlanngura, T-Sec.

Editor: Eddie Lalfakzuala (7005269255); **Jt. Editor-te:** Lalrotluangi Zote, RK Lalmuanpuia, Lalnuntluanga, Vanengmawia

Manager: C. Lallianzuala (9862365843); **Asst. Manager-te:** Zodingliana, Lalrinchhana, Lalrinawma

Circulation Managers: PB Lahuapzauva, Samuel Lahlupuia, Hmingthanzuala, Vanlalrinkima, R. Zodinsanga, Zothankhuma, Lalrinchhana, K. Lalmuanpuia



ZIN & HAW

■ Dr. Joseph Lalhminglana, RN YMA, Asst. Secretary chu a nupui Dr. Maggie Lalmuanpuii nen inentir turin CMC, Vellore-ah an kal.

■ Pu Rorelliana, RN YMA Treasurer chu chhungkaw pawimawh buaipuiin Shillong-ah a zin.

■ Pu Lalremsanga Hnamte, ECM chu thil pawimawh buaipuiin Champhaiah a zin.

■ Er. R. Lalthakima, T-Sec. chu inentir turin New Delhi-ah a zin.

■ Dr. C. Lalrammawia, T-Sec. W. Phailenga zin chu a lo haw leh ta.

■ Pu Lalawmpuia, S-Sec. chu a hna thawhna hmun J&K atangin chawlh hmanin a lo haw.

■ Pu VL. Zahawma, V-Sec. chu Synod Finance Campaign-in NE. Khawdungseiah a zin.

■ Tv. Lalmuanpuia s/o Robert Lalhmingthanga, S-Sec. chu a zirna chhunzawm turin New Delhi-ah a kal leh ta.

■ Pu K. Lalnunmawia, C-Sec. chu a hna thawhna hmun Mamit atangin a lo haw.

■ Rev. Dr. Vanlalnghaka Ralte, N-Sec. kohhran thil pawimawh Shillong zin chu a lo haw leh ta.

■ Dr. PC. Lalawmpuia, V-Sec. te chhungkua chu a hna thawhna hmun Champhai lamah an kal leh ta.

■ Tv. Laldinpuia, N-Sec. committee member chu ran ngo zawngin Champhaiah a zin.

■ NI. Lalremsiami Khiantge c/o Zohmingthanauva, V-Sec. chu a zirna hmun New Delhi atangin a lo haw.



LAWMAWM

■ Pu Lalduhzuala, N-Sec. chu Independence Day, 2025 ah Governor's Silver Medal dawng tura thlan a ni.

■ Tv. LR. Timothy s/o Rorelliana, S-Sec. chu British Army-ah a tling thar.

■ Pi V. Lalthanpuii w/o C. Laldampuia V-Sec. chu Mizoram University-ah Assistant-ah a kaisang.

■ Tv. Lalnupuia Fanai s/o Dr. F. Lalthanpui, S-Sec. chu Mizoram Homestay model Challenge Competition Tourism Deptt. in a buatsaih ah Category A ah lawmman pakhatna a dawng.

■ NI. Zohmingsangi Khiantge d/o Hmingthanchhunga Khiantge, K-Sec. chu MPSC hnuaiah Stenographer turin a tling thar.

LEI PIAH LAMAH



VL Hmangaihzuale,

K-33s/o Lalthankhuma (L) V-Sec. chu ni 06.08.2025 (Nilai ni) chawhnu dar 12:50 khan a boral a, a tuk ni 07.08.2025 (Ninga ni)

chhun dar 12:00 ah Ramhlun North Thlanmual Zemabawkah vuiliam a ni.



Lalawmpuia Royte,

K-39 h/o Thangngovi, V-Sec. chu ni 06.08.2025 (Nilai ni) zan dar 8:55 khan a boral a, a tuk 07.08.2025 (Ninga ni) chawhnu dar 2:00 ah Ramhlun North Thlanmual, Zemabawkah vuiliam a ni.



Lusun khawhar chhungte thlamuantu Pathianin vengin awmpui mawlh rawh se.



DAMLO

■ HT. Zothankimi d/o Vanengmawia, (Jt. Editor) chu LRM Hospital atangin in lama enkawl chhunzawm turin a lo chhuak.

■ Pi Thanzami w/o Pachhunga (L) K-Sec. chu Greenwood Hospital-ah enkawl mek a ni.

■ Pu Lalsawmzuala, V-Sec. chu LRM Hospital atangin in lama enkawl chhunzawm turin a lo chhuak.

■ Pu C. Lalmangaiha, C-Sec. chu natna hrang hrang avangin Nazareth Hospital, Ramhlun North-ah enkawl mek a ni.

■ Tv. C. Lalduhpuia s/o C. Lalthankima, T-Sec. chu natna hrang hrang avangin Nazareth Hospital, Ramhlun North-ah enkawl mek a ni.

■ Pi Lalnunmawii w/o Laltluanga Sailo (L), T-Sec. chu Ebenezer Hospital-ah zai a ni.

■ Pi Lalliani w/o R. Vanlalkunga (L), S-Sec. chu taksa chak lohna avangin in lamah enkawl mek a ni.



PAWL DANG

Ramhlun North Football Club : Ramhlun North FC te chuan I-day Football khelh mekah Quarter Final hial an han thleng thei a. Quarter Final ni 11.08.2025 (Thawhtan ni) dar 10:30 ah hian Chanmari FC nen RG Stadium-ah an khel leh dawn a ni. Vengchhung mipui ten min support-na zawng zawngah te, thilpek peknaah te lawmthu an sawi a, support zui zel turin min sawm bawk a ni.



KEIMAHNI

■ MARYMA agent ruat thar te:

1. Anison Lalnunngila, T-Sec

2. Lalruatfela, V-Sec

■ Tunlai kawng chhia avangin press lamin paper an khaihlak a, MARYMA kan print ngai lohnaah kan print tir a, tlema a lo danglam ta deuh a ni pawhin min lo hrethiam turin chhiartu te kan innngen a ni e.



LIBRARY

(Headline chhunzawmna)

Hmachhawp la awmte: YMA Library a changtlung ve viau tawh kan tih laiin hmabak pawh a la awm ve zel a. Hmabak la awm tih hlawhtlin tura ruahman sate chu:

1. School-te nena thawhho: Ramhlun North Branch YMA Exe. Committee remtihna in kan veng Sorkar school pahni, Govt. Model English Medium Primary School leh Govt. Endala Middle School-te nen a tul anga thawhho tum a ni a, zir laite chhiar tur leh an duh ang lehkhaw thahnm tak lei tawh a ni.

2. Smart TV: A chungka kan sawi tak ang khian School-te nen thawhho tum a nih avangin zir laite hman tangkai theih tur Smart TV la neih tum a ni. Amaherawhchu, hemi atan hian sum neih sa a awm rih lo thung.

A tlangkawmna: YMA Library-ah hian member la ni lo, ni duh kan awm chuan Library hawn ni apiangin Member a nih theih reng a. Chutih rualin, Aug. Ni 12 hi National Librarian's Day a ni a, ngenna kan dawn angin zan lamah inhawn tum a ni. Member ni duhte tan hemi zan bikah hian a thlawnin Member a nih theih ang. Zan dar 7 - 9:30 vel thleng Library hawn a ni ang a, Library tlawhtute tan thei tui buatsaih a ni ang. Library tana sum leh pai, bungrua thawhtu zawng zawngte hnenah lawmthu kan sawia, Library hlut zual deuh deuh turin kan insawm a. Finna Inpui a nih hre rengin, kan fate hmakhua ngaia Library tlawh uar turin kan innngen e. Chhungkuua tlawhtu pawh an awm chho deuh renga, chhungkuua hun hmanna tlaka chhuah zel turin veng chung mipuite'n mawhphurhna kan nei theuh a ni.



THILDANG

Insawn:

1. Pu Ebenezer-a te chhungkua chu Pu J. Thanseia (L) S-Sec. atangin Rev. Ramngaihawma Khiantge te in V-Sec. inah an insawn.

2. Pi Lalthanpuii w/o KC Malsawma (L), te chhungkua chu Pu Thanchunga (L), N-Sec. In atangin Pu K. Tlangruala te in S-Sec. inah an insawn.

NOTICE

Pi Lallianpuii M/o Lalrinlana, Ramhlun North, Aizawl chu 12.03.2024 khan a boral tak avangin a fapa Lalrinlana, Ramhlun North, Aizawl, Mizoram chuan a nu, Pi Lallianpuii hminga awm LSC No. 877 of 1978, Ramhlun North, Aizawl, Mizoram a mi chu a rochun theih nan Heirship Certificate Court-ah a rawn dil a, hemi chungchanga sawi tur nei chuan chanchinbu a chhuah a nih atanga ni 30 ralhmain a hnuaia hming ziaak hnenah ziaaka thehluh tur a ni. Hun tiam a ral hnu chuan a dil ang hian pek a ni ang.

Civil Judge (Jr. Div- III)
Aizawl District, Aizawl

MARYMA		PHEK 4-NA		RN YMA CHANCHINBU	
📰ARTICLE KHUA A TLAI HMA HIAN -C. Laizawna T-Sec. Veng pakhata an mitthi vuinaah chuan, an mitthi vui tur chanchin an sawi thawi thuak ka ngaithla a, khawtlang leh chhungte tan tangkai aia hnawksak chang nei ni awm tak a ni. Vuinaah chuan a chanchin an han sawi a, naupan lai atanga fel, thil tha tam tak ti a lo ni reng mai a. Hmabak eng tak nei a ni nghe nghe a. Veng hrang hrang, khaw tam takah hian kan sun mekte hi an chanchin kan lo hre lo hle mai tih tur a tam. An ruang chungah chungte chu kan sawi chhuak a, khawhar lenpuinaah te amah fakna awka chu, ama hriat tawh si lohah kan sawi ta teh mai a. Ka inngaihtuah a, tih awm tak, ka lo tih si loh, a hnua ka tih leh tho te hetiang hi a ni - A then chuan an mamawh lovang, a then chuan an mamawh thei, a dam lai khan puan emaw, kawr emaw, mawza emaw pawh ka leisak lo va, ka duhsak lem lo va, a tan sum sen ka phal lo; a thih hnuaah puanin ka tuam a, ka tuam chhan pawh, amah duhsakna aiin mahni mawi nan a ni fo. Puana ka tuam awm tak hi chu tlemte an ni. Pangpar man to deuh mai kenga a ruang bula va din a, han dah chang ka nei. A chang chuan man to lem lo pawh a ni thei a. A dam lai khan duhsakna pangpar ka pe ngai lo, a thil tih thatah pawh chawimawina leh fakna tawngka pawh ka chhakchhuak ngai der si lo va. An mamawh em em, an buai lai, damdawi man an mamawh laite khan kanna pawisa pawh ka pek loh an lo tam hle a, lo pe ila an hman tangkai lehzual dawn nen. Ka tih theih reng ka tih loh tam tak ka hre teh mai, ka sawi zel zak tawh e. Mi chhuanawm tak tak, chawimawi phu tak takte hi enga ti nge an dam laiin kan chawimawi loh? An thil tha tihte chu enga tinge kan sawi chhuah loh a, an tihsual zawk kan sawi lar em em mai le? An thil tha tih chu an tihsual palhin kan chhilh mai zel a. Enga tinge mi hlawhtling ni thei tur ni si kha, thei reng sia kan puih loh? Han pui zauh ila, han sawi pui ila, a tul leh chhawmdawl ila, mi hlawhtling a lo ni reng dawn a. Kan chutih loh avang chuan zu bawihah, damdawi bawihah an tang a, an beiseina chu beidawnnaah a chang ta mai si a. A ni em em lovang, an thih hnuaah fakna tur kan dap chawp mai mai a ni lo maw? Nge, fak an phu angin kan la fak pha lo zawk? Tar chak lo tak kan thlah liamte kha, veng hla tak atang te pawhin sun tura lo kal vang vangin, an ui thu, hmana thil a lo tihsak vanga a lawm thu an rawn sawi a, a dam loh laia an kan theih loh vanga thupha chawina an han sawi ngei bawk a. Chutiangin mi dang dang pawhin kan tih theih reng kan tihsak si lo, inchhir thua kan thlah tak hi a tam thei hle awm e. Mi kan va chawimawi leh kan puih hian, hekna tak tak kan nei lo, kan nep phah hauh lo asin, anmahni an lawm ang bawkin keini pawh kan lawm a. Mahse maw, tam tak hi chuan chawimawi hi kan zo lo ve tho mai, chawimawitu nih pawh kan zo lo ve thei bawk. Lo lang Chiang ta chu, tumah hi sual tak tak an lo awm lo tih leh, thil tha tih tur hi eng hunah pawh hian a lo awm thei dawn a ni tih hi. I tih theih lai leh khua a tlai hma hian han ti tan chhin teh, kei pawn entawn che ka lo tum ang e.		🔊ADVERTISEMENT KC TUI (10-3) Tui thianghlum, PickUp-in 2,000 litre kan pe thei reng e. Ramhlun North veng chhung tan discount kan pe e. Ph: 7005010327 / 9774223462 SEPTIC TANK KHAT & REPAIR Septic tank khat paih leh repair kan ti thei reng a, rate chu inbiakremna a ni ang. Contact: 9612376373 C/o Marina: 9436140350 (5-3) SAWMA SEPTIC TANK SERVICE Septic Tank khat paih fai, commode block, pipe fit, soak pit thar siam engkim kan ti thei e. Rate: Inbiakremna Ph: 8119969364 (10-1) JM SEPTIC TANK SERVICE Septic tank khat paih fai, comode block, pipe fit, soak pit tha lo leh a thar pawh kan siam thei reng e. Kan sulhnu a fel fai a, service hlun leh rintlak kan ni e. Rate inbiak remna. Registration: MRS 542 Contact: 9862476439 / 9436199884 (10-1) KHIANGTE SEPTIC TANK SERVICE Septic Tank khat paihfai, Comode Block, Soak pit, Pipe Fitting, Repair engkim, khur chhung lutin, a neitu te lungawi na thlap in kan thawk thei e Contact - 9862344971 Bawngkawn South (20-11) L.H SEPTIC TANK SERVICE Septic tank paihfai leh repairing engkim kan thawk thei e. Kum 17 chuang experience nei kan ni e. Rate:4500 per trip Ph.6909183193 (30-10) COMPUTER CLASS FREE ADMISSION CCA/DCA December exam turin Free Admission hawn mek a ni leh ta e. . . Free Study Materials. Free PC Hardware Maintenance & Windows/Software Installation. Mon - Fri Class kal hman lo tan Saturday-ah Class a kal theih bawk e. Class timing 7:00am - 6:00pm (Mon-Fri) HI-TECH INSTITUTE OF COMPUTER Zarkawt (Near Traffic Point) & Ramhlun North (Industry peng. Opp. Traffic point) 9862343182 / 9089612701(WhatsApp/Call) JOJO COMPUTER INSTITUTE (Govt. Approved Institute) Chanmari, Ramhlun Road, Near Treasury Computer zir duh tan DCA course-ah free admission hawn mek a ni e. Computer zirna hlun leh experience nei tha, faculty tha tak nei kan ni e. Admission hi online pawhin a tih theih a. Textbook a free-in pek zel an ni; website changtlung tak mahni inzirna tur kan nei bawk. Ph/Whatsapp: 9612728031, 9612359711 ZCD ELECTRICALS Electric bungrua chi hrang hrang GEYZER, ISTIRI, OVEN(OTG), HEATER, LED LIGHT, FAN kan kawl e. House wiring pawh kan tih sak thei e. Kan hnena bungrua la te discount kan pe zel e. Proff Contract kan ni a . Wholesale leh Retail in kan pe thei e. Add:- RAMHLUN NORTH , LAD OFFICE OPPOSITE SUMO STAND BUL, PH :- 9862344138			
Published & edited by Eddie Lalfakzuala for and on behalf of Ramhlun North Branch YMA. Copies- 1,270					